

إِنَّ الدِّينَ عِنْدَ اللَّهِ الْإِسْلَامُ



لَا إِلَهَ إِلَّا اللَّهُ مُحَمَّدٌ رَّسُولُ اللَّهِ

Khutba Jummah

HADHRAT MUHYI-UD-DIN AL-KHALIFATULLAH

Munir Ahmad Azim

06 Avril 2018
(18 Rajab 1439 AH)

Après ki li fine salué tous so bane disciples (et tous bane Musulmans) entier le monde avec le Salaam - la Salutation de paix dans l'Islam - Hazrat Khalifatullah (atba) fine lire Tashahhud, Ta'uz, Surah Al Fatiha, et ensuite li fine axé so Khutba lor: « **Sacrifice Financier (Partie 2) ».**

Alhamdulillah, Summa Alhamdulillah, mo pé contigne le même sujet de mo Khutba Jummah ki mo ti commencé vendredi dernier lor le Sacrifice financier.

Donc, couma mo fine dire la semaine dernière, la solution de tous bane problèmes économiques et bane les autres problèmes de l'homme, de tous bane croyants li trouve dans dépenser dans le chemin d'Allah (twa). C'est remède pour vaincre la pauvreté et toutes sortes de difficultés et de problèmes.

Ene l'autre remède pour vaincre la pauvreté c'est la foi. Kan nous fini paye *Zakaat* et bane les autres contributions financières, nous la foi augmenter et nous recevoir le plaisir d'Allah. Allah zamais pas ignore bane ki faire bane sacrifices pour Li. Li pas prive zot zamais de zot bane besoins. Ena dimoune ki mendiant soit d'Allah, soit li mendiant pour sa lé monde là. Mille fois li vine ene mendiant devant Allah. Celui ki choisir vine mendiant d'Allah au lieu mendiant de sa lémonde là li ene dimoune vraiment intelligent. C'est sa ki appelle ena vrai l'intelligence.

Nous bizin tous les temps garde à l'esprit ki kan nous vine ene mendiant devant Allah, nous pou gagne le plaisir d'Allah. C'est ene réalité établie. Pas ena aucaine doute à propos sa. Certains dimounes plaigner, à cause ene malentendu, ki Jamaat Ul Sahih Al Islam sak fois sak fois insister lor le besoin pou ki so bane membres faire bane sacrifices financiers et ki li pas donne l'importance à bane les autres kitchoses ki nécessaires. C'est pas bane officiers du Jamaat, mais c'est Allah Li-même ki, dans Quran Shareef, exhorte bane croyants pou faire bane sacrifices financiers. Bane officiers zot nek mette de l'avant bane exhortations d'Allah, et alors par conséquent, zot en aucaine cas fautif. Donner dans le chemin d'Allah c'est, en fait, pour propre bénéfice spirituel et matériel de sakaine d'entre nous.

Donne bane contributions financier dans le chemin d'Allah développe la sincérité d'ene dimoune et purifier so l'âme; sa aide li pou gagne le *Taqwa* (la crainte d'Allah, la droiture, la piété). En fait, *Taqwa* vine manifeste à travers sa. Bane perspectives de sa dimounes là changer et li attire le plaisir et bane bénédictions d'Allah et même si li ena bane défauts et bane faiblesses, so bane contributions pas tombe dans de l'eau (zot pas en vain). Allah, par So grâce, néglige même so bane fautes et aide li pou reforme li pour le meilleur.

Allah Li plus grand, plus gentil et ena plisse capacité pou ena l'amour ki sa dimoune là so bane parents. Li (Allah) pli protecteur et pli féroce pour défendre So bane serviteurs bien-aimés. Nous apprane dans Quran Shareef ki Li (Allah) passe lors fautes de So bane serviteurs ki Li content. Mo conner ki Allah passe aussi lors fautes de bane ki faire bane sacrifices financiers pour Li. Sa bane dimounes là grandi dans la piété. Ene maman ki dévoué à Allah, ki dévoué à so la foi pas pou heureuse si so bane zenfants pas dépense zot l'argent pour la religion. Sa kalité maman là pas considère ki dépenser dans le chemin d'Allah li ene fardeau pour so bane zenfants. Li oulé ki zot participe dans sa bénédiction là.

Mo conne bane parents de certains zenfants ki empêche zot bane zenfants ki fine fek commence travaille pour faire bane contributions dans le chemin d'Allah. Raison ki sa bane parents là donner c'est ki zot bane zenfants pas gagne assez l'argent et donc zot pas bien établi financièrement dans la vie. Certains parents trouver même ki sa dépense dans le chemin d'Allah là li ene gaspillage (*Nawzobillah min Zalik*).

D'ene l'autre côté, ena bane les autres parents ki reconnaissants pour bane bénédictions ki zot fine recevoir à cause de zot bane contributions et zot pas ouler prive zot bane zenfants pou bénéficier aussi de bane bénédictions d'Allah. Alors zot exhorte sa bane zenfants là pou contribuer dans le chemin d'Allah.

Certains zenfants ki fine gagne ene bien bon l'entrainement avec zot bane parents comprend la philosophie pou donner dans le chemin d'Allah. Certains jeunes, *Alhamdulillah*, envoye moi zot bane revenues pou ki servi sa dans le chemin d'Allah, tandis ki ena bane les autres, ki avant ti pé participe dans bane activités du Jamaat, mais ki ensuite fine abandonne sa pratique là. Zot bizin faire bien attention, attention sa vine ene malédiction pour eux. Rappel zot ki dépenser dans le chemin d'Allah c'est sa même l'investissement le plus intelligent pour ene croyant. Allah zamais pas pou fer zot retourne la main vide! Kan zot rappelle Li et ki zot content dépense dans So chemin, kot zot aide la cause d'Allah dans n'importe ki façon et capacité ki zot capave, et avec n'importe ki moyen zot ena, Allah pou rende zot tous sa là, et pou multiplier zot bane investissements, ki li dans sa lémonde là et dans *Aakhirat*. Mais tous dimounes pas comprend sa précepte vital de la vie là; et zot pas comprend la bonté et la générosité d'Allah.

Bane parents bizin encourage zot bane zenfants dans zot l'intention pou aide la cause d'Allah. Bane parents ki empêche zot bane zenfants pou dépense dans le chemin d'Allah zot privé de bane bénédictions d'Allah. Alors ki sa bane zenfants là zot toujours prêts pour servir la cause d'Allah, mais kan zot ena bane tels parents ki conseille zot pou agir autrement, kot zot décourage zot zenfants pou pas « gaspille » zot l'argent dans le chemin d'Allah, sa li en vérité bien mauvais. En fait, Allah Li-même dans Quran Shareef conseille bane croyants pou donne Li (Allah) préférence et So bane commandements, et ensuite vine bane parents et zot bane souhaits. Maintenant, si bane parents encourage zot bane zenfants pou respecter bane commandements divines, sa bane parents là zot vraiment bane très grands dimounes, ki digne de louanges, de l'amour et de bane bénédictions d'Allah. Mais si bane parents mette de côté bane commandements d'Allah et empêche zot bane zenfants pou vine pleinement bane serviteurs d'Allah, alors bane zenfants là, quoi ki zot bizin toujours respecter zot bane parents et guette zot bien, mais selman lor question de zot la foi, zot bizin refuse obéir sa bane mauvais l'enseignements de sa bane parents là et donne préférence à bane l'enseignements éternels d'Allah et mette zot en pratique.

Beaucoup de sa bane kalité cas là fine vine devant moi kot bane zenfants trouve zot dans ene situation bien difficile kan zot propres parents empêche zot pou dépense dans le chemin d'Allah, et par la grâce d'Allah, mo fine capave régler sa bane questions là amicalement en tant ki ene Messenger d'Allah, ce ki veut dire ki Allah fine place moi couma ene chef d'ene famille mondiale kot bane dimounes capave approcher sans peur et expose zot bane problèmes dans ene façon informelle, à l'aise, sans ki zot bizin hésiter.

En relation avec sa question vitale là, mo l'attention fine attiré lor sa verset Quran là:

Pas touye zot bane zenfants par crainte de la pauvreté. (Al-Anam 6: 152).

Sa verset là li généralement et correctement interprété comme veut dire ki personne faudé pas pratique le contrôle de naissances à cause la peur ki zot pas pou capave occupe zot de zot bane zenfants ou pour bane les autres raisons économiques nationales. Sa verset là applique généralement à sa sujet là. Mais sa capave aussi être interprété comme veut dire ki spirituellement parlant, ou pou touye ou bane zenfants par ou propre la mains si ou empêche zot pou faire bane contributions financiers dans le chemin d'Allah.

Li essentiel ki bane membres du Jamaat Ul Sahih Al Islam bizin en permanence être rappeler et guider dans la compréhension de bane bénédictions bénéfiques ki résulter du don ki ou faire à Allah, dans So chemin, parski en vérité Allah conne tous bane conditions de nous les cœurs. Nous bizin donne dans le chemin d'Allah avec pleine conscience, humilité et ene sentiment authentique. C'est sa l'esprit là ki Allah (swt) content et ki li difficile pou exprimer avec bane mots. Parfois, ene kikaine donne kitchose à ene l'autre dimoune zis pour débarrasser de li, ou à ene zenfant persistant zis pour faire li reste tranquille. Pareillement, bane dimounes donne parfois quelque chose à ene mendiant. Li préférable ki ou donner avec bane sentiments sincères et agréables ki fonne ou lé cœur, et ki éveille ou humanité et la conscience ki ou seulement ene voyageur temporaire dans sa lé monde là, et ki c'est la caze d'après ki pou éternel pou ou. Si ou vive avec sa qualité conscience là, et ki ou dédier tous bane bons travaux pour l'amour d'Allah, alors Allah (twa) pou faire de même avec ou. Li pou retourne ou tous sa là et Li pou même donne ou plisse ki sa. Li pou montrer ou ki kalité grand Li grand et ki kalité Li généreux et gentil. Alors zot pou recevoir ene l'amour et l'affection éternel de la part du Créateur de bane les ciels et la terre Li-même, zot propre

Créateur, ene tel Être ki tous les temps pou là pou zot, même kan tous pou fini ene jour.

Donc, si bane membres donner (dans le chemin d'Allah) avec sa l'esprit (de sacrifice là), alors nous Jamaat, et toute la communauté islamique - ene sel lé corps avec ene sel l'âme (Le corps de l'Islam - ki touché par le Saint Esprit - et les sacrifices de tous so bane membres) - pou prospérer à grand pas et personne pas pou capave bloquer so bane progrès.

Ki Allah permette nous pou faire sa. *Ameen, Summa, Ameen, Ya Rabbul Aalameen.*